

Waimiha, Mōrehurehu me te Mahi Raranga

Ka haere atu te tereina ka tae atu ki Mangapēhi, ka haere atu ki Porotarao ka puta atu i te tana, ko Waimiha tēnā, i whānaungia au ki reira, kātahi au ka whakahokia mai ki te tuahine o taku pāpā, i Mōrehurehu ia e noho ana rāua ko tāna koroheke, ko Te Tūranga te ingoa o tana hoa tāne. Ka whakahokia mai au mā rāua au nei hei tiaki, na i tupu ake au ki Mōrehurehu kei tua, kei muri o Te Kūiti, he kāinga nui tērā nō ngā tūpuna nō tenei karangatanga nō Ngāti Apakura, koia rā ngā kōrero a taku whaea ki a au, te mahuetanga iho ko rāua anahe ko tana koroheke, ko ā rāua tamariki atawhai ko mātou, kāre kau ana hoki ōna uri, na koinā ōku mātua nāna au i atawhai ake, i atawhaingia i Mōrehurehu. Ka noho au i Mōrehurehu i a au e tamariki ana a, ka akona au e taku whaea ki ngā mahi i ērā wā

Ā, nā he mahi raranga a e tamariki ana au, ka akona au engari ērā mahi anō he, ka kī mai ki au, haere, tākirikiringia mai ngā kōkā o ngā harakeke, ka haere au ka tākirikiri i ngā kōkā a ngā harakeke, ka hari mai, ā ka kī mai ki au, a, na herea ai e koe, me wāhia e koe te harakeke, a ka tītoi te harakeke, ka here hei whatu i ngā harakeke kōkā, koirā tāku mea tuatahi i akona au e taku whaea, nā ka whatu whēnei te whatu korowai nei, he kōkā harakeke ngā mea nei

Ko ngā mea kua maroke, koirā te ingoa o ērā mea ki a mātou kua kōkā nei, kua maroke, ā ka whatu au, ā ka oti, kātahi ka kī mai nā, whārikingia ki konā nā, na hei nohonohonga i te taha o te ahi, koirā hoki ngā mahi o tērā wā, he tahu he ahi ki roto i te kāuta, na he whāriki hei nohonohonga, na koirā te mea tuatahi i mahia e au i kōrerongia ai au e taku whaea, a heoi anō i muri mai ka noho, a e kite ana hoki au i a ia e tahu wai ana ki roto i ngā oko, nā ka mahi he harakeke, ka hāpine ka maka ki roto i te wai ka tahu, koropupū ka whakairiirihia, na hei mahi whāriki, ā koia te mahi o taku whaea,

Ā i tētehi wā ka kī mai ki au, kia tahuri au ki te mahi e tamariki ana au!

kore rawa au e tae ki te kī atu he pēhea taku tamariki e mōhio ana au e tino tamariki ana au, engari kua mōhio hoki au ki ana mahi e kī ana au. Nā ka tahuri au ki te mahi

i ngā harakeke ā me kōhua e koe ka kōhua ka whakairi, ā ka maroke kātahi ia ka kī mai ki au, na kia tītoitoia na ka mahia e au te whāriki, na ka mahia e au taku whāriki ā pēnā anō hoki pea te roa, a, ā ka mutu ka kī mai me hono, a ka tohutohua e ia ahau ki te hono, ka mahia e au ka oti, ka mutu, ka mutu hoki tērā mahi i tērā mahi te whāriki, a ka akona au ki te mahi kete e ia. Ngā kete noa iho nei, kete rīwai noa iho nei, nā ka akona au ki te mahi kete muka, e kī ana tērā kei te heke te puhipuhi

Na, he muka, ka whatungia taua kete rā, he muka ā, me ōna kara anō haere ka mahia he kara anō mō runga i te kete, nā ka oti tēnā kātahi anō ka whatua anō tētehi mea koia tērā te puhipuhi o tērā mea, kātahi ka whatua aua muka rā aaa ka mutu kātahi ka whakapiria atu ki te kete, whakapiria atu ki te kete haere i te taha, haere i tētehi taha, hurihuri katoa he puhipuhi ēnā, he puhipuhi ēnā nō te kete, he puhipuhi ēnā, a ka akona au e ia ki tērā mahi i ērā wā ka mutu atu, ka noho ia ā ka mahue ai i a matou a Mōrehurehu, ka tikina mai mātou, e tō mātou matua ake e Tūwhāngai, tae mai ki tana tuahine ka kī atu i haere mai au ki te tiki mai i a koutou, ka haere tātou ko ō kōtiro, ko ahau tētehi kōtiro atawhai anō nō ngaku mātua ā, e karangangia ana nā ō rāua teina taua kōtiro nei, kua haria mai hoki hei hoa mōku i tērā wā, kua mate hoki tō mātou pāpā a Te Tūranga.